

TELITI

...Ahmad Zahid (dua dari kiri) membaca Tafsir Pedoman Muttaqin sambil diperhatikan (dari kiri) Dr Abdul Hayei, Dr Abdul Shukor dan Wan Mohamad Sheikh.

50,000 terjemahan al-Quran untuk bilik hotel lima bintang

PUTRAJAYA: Sejumlah 50,000 naskah terjemahan al-Quran akan ditempatkan di setiap bilik hotel bertaraf lima bintang di seluruh negara, tidak lama lagi.

Menteri di Jabatan Perdana Menteri, Datuk Seri Dr Ahmad Zahid Hamidi, berkata langkah yang sudah mendapat persetujuan Kementerian Pelancongan dan Perhubungan dan Perindustrian Malaysia (MAH) itu selaras usaha penyebaran dakwah kepada penginap hotel.

“Sebagai permulaan 50,000 naskah terjemahan al-Quran akan dicetak dan diagihkan kepada hotel bertaraf lima bintang untuk diletakkan dalam laci setiap bilik,” katanya pada sidang media selepas melancarkan kitab Tafsir Pedoman Muttaqin di sini, semalam.

Hadir sama, Pengerusi Muzakarah Jawatankuasa Fatwa Kebangsaan merangkap Pengerusi Lajnah Tasheh Tafsir Pedoman Muttaqin, Datuk Dr Abdul Shukor Husin; Ketua Pengarah Jakim, Datuk

Wan Mohamad Sheikh Abdul Aziz dan penulis Tafsir Pedoman Muttaqin, Dr Abdul Hayei Abdul Shukor.

Ahmad Zahid berkata, Jakim akan sentiasa memantau kedudukan al-Quran di bilik hotel supaya diletakkan di tempat sesuai dan selamat.

Beliau juga berkata, pihaknya mensasarkan melahirkan 30 imam daripada golongan cacat penglihatan setahun menerusi program yang dijalankan di Darul al-Quran Kuala Kubu Bharu, Selangor bermula Disember ini.